



Sud Bosne i Hercegovine
Sud Bosne i Hecegovine

Broj: S1 3 Iž 037786 20 Iž
Sarajevo, 20.10.2020. godine

Sud Bosne i Hercegovine, u vijeću Apelacionog odijeljenja sastavljenom od sudija Mirsade Džindo, kao predsjednika vijeća, Zvezdane Antonović i Dinke Bešlagić Čovrk, kao članova vijeća, odlučujući o žalbi Bratić Antonije, Pod Sv. Nikolom 5, Mlini–Soline 20207, R Hrvatska, (kod Ilije Sentića) izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 20.10.2020. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žaliteljicu odbijen je upis iz razloga što je na istoj adresi registrovano više od šest lica.

Žaliteljica je protiv navedene odluke blagovremeno izjavila žalbu u kojoj navodi da ispunjava uslove za glasanje putem pošte. Predlaže da se žalba usvoji, kako bi mogla ostvariti svoje građansko pravo da glasa.

Centralna izborna komisija Bosne i Hercegovine u odgovoru na žalbu navodi da adresa za dostavu glasačkog materijala za Bratić Antoniju, označena u Prijavi za glasanje izvan BiH PRP-1, ukazuje na mogućnost organizovanog djelovanja

pojedinaca ili grupe na zloupotrebi biračkog prava, obzirom da je utvrđeno da je ista adresa izvan BiH za više od šest lica, zbog čega predlaže da se žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Iz stanja spisa proizlazi da je Centralna izborna komisija BiH prije donošenja pobijane odluke utvrdila da je označena adresa za prijem glasačkog materijala kao i elektronska adresa na prijavi ista, kako za žaliteljicu tako i za još 6 lica, sa istom biračkom opcijom za sve prijave.

Stoga, Centralna izborna komisija BiH je, na osnovu potpuno i pravilno utvrđenog činjeničnog stanja, izvela i pravilan zaključak, da bi se dostavom osjetljivog izbornog materijala na istu adresu Pod Sv. Nikolom 5, Mlini–Soline 20207, R Hrvatska, (kod Ilije Sentića), povrijedilo osnovno izborna načelo tajnosti glasanja i izbora direktno od strane birača, a koje garantuje odredba člana 1.3 Izbornog zakona BiH, te da izborna manipulacija može za posljedicu imati planirani izborni rezultat.

Napomene radi, žaliteljici nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

Predsjednik Vijeća
Sudija
Mirsada Džindo